

# LOU FELIBRE D'ENTRE-MOUNT

A MOUSSU E. MARBOT

GRAND VICARI D' AIS

Nascu sout un soulèu frai de noueste soulèu,  
Te siés amourousi de la bello Prouvènço.  
Se d'aquest librihoun l'òumàgi noun t'es grèu,  
Sara moun pagamen e ma boueno chabènço.

F. G.-T.

Ais, lou bèu jour dei Rèi, 6 de Janvié 1880.

## CHAPITRE I

*Toubio mena en esclavitudò. Abandouno pas la lèi de Diéu e ensigno la cregnènço de Diéu à l'enfant que Ano vèn de li douna. A lei bouenei gràci dóu rèi Salmanasar e va mounte li fa plesi. Assousto sei fraire esclau coumo éu e leis ajudo de soun argènt prèsto de la man à la man des talènt à Gabelus. Sennaqueriéu lou persiegue, pèr ço que enterro lei mouert.*

1. Toubio, de la tribu e de la ciéutat de Nèutali, (qu'es de pèr daut de Galilèio, en dessus de Naassoun, darrié lou camin que meno au tremount ; à senèco se trobo la ciéutat de Sefèt),
2. Siguè mena presounié dins lei jour de Salmanasar, rèi deis Assirian, e dóu tèms de sa cativita, abandonè jamai la draio de la verita.
3. Cade jour, partejavo tout ço qu'avié emé sei fraire en cativita dóu meme païs qu'éu.
4. Basto siguèsse lou pus jouine de touto la tribu de Nèutali, faguè jamai rèn que ressentèsse l'enfantuèio.
5. Dóu tèms que tóutei s'encourrien adoura lei vedèu d'or que Jeroboan rèi d'Israèu avié fa, soulet, Toubio fasié rasso en despart.
6. E anavo à Jerusalèn, dins lou tèmple dóu Segneur, li adouravo lou Segneur Diéu d'Israèu, li semoundènt fidelamen soun dèime e sa frucho proumierenco.
7. E à parti de l'an tresen, dounavo tout soun dèime eis estrangié em'ei paure.
8. Tout bèu just enfantoun, gardavo tóutei lei mandamen de la lèi de Diéu.
9. Devenu ome, espousè uno fremo de sa tribu, que li disien Ano, e n'en aguè un enfant en quau dounè soun noum.
10. De bas àgi, li ensigné de crègne lou Segneur e de se gara de tout pecat.
11. Adounc, coumo siguè enmena presounié emé sa fremo e soun enfant e siguè arriba dins la ciéutat de Ninivo emé touto sa tribu,
12. Dóu tèms que tóutei manjavon dei car dei gentiéu, gardè bèn soun amo e jamai s'embrutissè d'aquelo prevèndo.